



Foreldrasamstarf

Leikskólinn er lögum samkvæmt fyrsta skólastigið í menntakerfinu og annast að ósk foreldra nám barna á leikskólaaldri. Foreldrar bera meginábyrgð á uppeldi barna sinna og er leikskólanám viðbót við uppeldi foreldra en á engan hátt ætlað að koma í stað þess.

Foreldrasamstarf byggist á þessum grundvallaratriðum og því er mikilvægt að foreldrar þekki starfsfólk leikskólans og að samskiptin byggist á gagnkvæmri virðingu og trausti. Við leggjum mikla áherslu á góð samskipti og það að foreldrar séu óhræddir við að koma og ræða við okkur um hvaða málefni barnsins sem er. Foreldrar og starfsfólk vinna saman að því að gera það besta fyrir hvert barn hverju sinni og sýna traust, trúnað, sveigjanleika og sanngirni. Sum börn dvelja stóran hluta dagsins í leikskólanum, því er nauðsynlegt fyrir starfsfólkið að vita um líðan barnsins og venjur heima fyrir. Við viljum að foreldrar finni sig ávallt velkomna í leikskólann og leggjum áherslu á góð samskipti og þátttöku foreldra í starfi leikskólans. Boðið er upp á foreldrasamtöl tvisvar á ári, en foreldrum er velkomið að biðja um samtöl oftast ef þeir vilja. Foreldrafundur er haldinn að hausti, þar sem vetrarstarfið er kynnt og foreldrafélagið heldur sinn aðalfund.

Í Uglukletti er borin virðing fyrir tíma foreldra og barna og mikilvægi samveru þeirra. Vistunartími barnanna í leikskólanum er því til viðmiðunar en foreldrar geta kosið að nýta ekki alltaf að fullu þann tíma. Á tímabilinu frá 11.00 til 13.00 getur verið erfitt að taka á móti börnum þar sem matartími og hvíld er á þessum tíma dagsins og biðjum við því foreldra að koma ekki með börnin sín á þeim tíma í leikskólann.

Dagleg samskipti og upplýsingastreymi til foreldra eru mikilvægir þættir sem stuðla að traustu og jákvæðu sambandi milli heimilis og

skóla. Í Uglukletti eru upplýsingatöflur í forstofu þar sem skrifaðar eru ýmsar upplýsingar til foreldra sem koma þarf á framfæri. Leikskólinn gefur út vikufréttir þar sem fram koma nánari upplýsingar um það sem er á döfinni hverju sinni.

Foreldrasamtöl

Tvisvar á ári, að hausti og að vori, bjóða deildarstjórar foreldrum í foreldrasamtöl. Þar fá þeir upplýsingar um stöðu og líðan barnsins í leikskólanum sem byggðar eru á athugunum á færni og þroska barnsins í leik og starfi. Foreldrum gefst þá einnig tækifæri til að spyrja spurninga og veita gagnkvæmar upplýsingar um barnið. Athugið að alltaf er hægt að óska eftir foreldrasamtali þegar þörf er á.

Foreldrafundir

Foreldrafundur er haldinn einu sinni á ári, að hausti til. Þar fá foreldrar margvíslegar upplýsingar um leikskólastarfið, skólanámskrá leikskólans og aðrar áætlanir í skólastarfinu. Foreldrum gefst tækifæri til að skiptast á skoðunum um leikskólauppeldi og þátttöku þeirra í leikskólastarfinu.

Foreldrafélag

Við leikskólann Ugluklett er starfandi foreldrafélag en aðild að félaginu er val hvers foreldris. Á haustfundi leikskólans eru kosnir 5 fulltrúar í stjórn foreldrafélagsins ásamt varamönnum. Verkefni foreldrafélaga eru margvísleg og geta þau stutt vel við leikskólastarfið. Það er því hagur hvers leikskóla að hafa öflugt og virkt foreldrafélag. Meðlimir í foreldrafélaginu greiða ákveðna upphæð í sjóð sem notaður er í ferðir, vorhátíðir, leiksýningar o.fl.

Foreldraráð

Samkvæmt 11.gr. laga um leikskóla nr.90/2008 skal kjósa foreldraráð við leikskóla og skal leikskólastjóri hafa frumkvæði að kosningu í ráðið. Kosning skal fara fram í september á hverju ári og skulu sitja að lágmarki þrír foreldrar í ráðinu, til eins árs í senn. Foreldraráð setur sér starfsreglur og ber leikskólastjóra að starfa með foreldraráðinu. Hlutverk foreldraráðs er að fylgjast með framkvæmd skólanámskrár og annarra áætlana innan leikskólans og kynningu þeirra fyrir foreldrum. Það hefur einnig umsagnarrétt um allar meiriháttar breytingar á leikskólastarfinu.